

LETTRE

D V

CAPITAINE

LA TOVR

CONTENANT LA REEVTA-
tion des Calomnies imposées au par-
ty du Parlement, & de la Ville
de Paris.

A PARIS,

M. DC. XLIX.

LETTRE

D V

CAPITAINE

LA TOUR

COMTE DE LA REUNION

non dessein de ces super-

ty de l'Armée de la Ville

de Paris

A PARIS

M. DC. XLIX.

LETTRE DV CAPITAINE LA TOVR

*comenant la refutation des Calomnies imposees
au party du Parlement, & de la Ville de
Paris.*

MONSIEVR, Vous trouuez mauuais que ie prenne employ dans les troupes du Parlement, & appellés cela vne conspiration de sujets rebelles, disant qu'il n'est pas moins deu d'obeissance à la Regence qu'à la Royauté, que le Parlement n'a deu agir que par tres-humbles remonstrances, qu'ayant trauersé le dessein de la Reyne, apres auoir connu qu'elle perseueroit en sa premiere volonté, elle a bien fait de sortir de Paris, où leur des-obeissance estoit appuiee, & de se mettre en estat de pouuoir contraindre le peuple à luy liurer les coupables qu'il soustient pour en faire la punition.

Pour moy, bien que ie ne vueille ceder à qui que ce soit la qualité de vray seruiteur du Roy, & que j'estime ne pouuoir mieux employer mon sang & ma vie, que dans ce deuoir, comme reconnoissant mon Prince estre la viue image de la Diuinité. Ie ne laisse pas pourtant d'estre fermement persuadé que les armes du Parlement & de la ville de Paris sont iustes, & qu'ils peuuent non seulement resister aux Ministres d'Estat & au Cardinal Mazarin: mais mesmes en cette occasion combattre contre la Reyne Regente, quoy qu'ils se contentent de porter seulement leur dessein contre le mauuais conseil dont elle est preoccupée, & ie m'assure que quand vous en aurez examiné les raisons, vous serez de mon aduis, & aduouerez que tout vray François est obligé d'embrasser leur querelle, tant pour son interest particulier que pour l'interest public, & pour le seruice du Roy & de l'Estat. Car premiere-ment ce n'est pas vne querelle particuliere du Parlement avec le Cardinal Mazarin, comme quelques esprits malicieux & ennemis de leur propre patrie, veulent persuader au mesme peuple, mais

elle est commune à tout l'Estat, puis que Messieurs du Parlement ne sont en cette peine que pour n'auoir voulu consentir à l'aneantissement des salutaires reglemens que leurs Maiestez leur accordent au mois d'Octobre dernier pour le soulagement des peuples, & au reestablishement des prests, des Partis des Tailles, & des affaires au mesme estat qu'elles estoient auparavant que le Cardinal Mazarin vouloit faire par le moyen de certaines Declarations qu'il auoit enuoyées en dernier lieu en la Chambre des Comptes, & à la Cour des Aydes, afin de pouuoir continuer ses leuées accoustumées sur le peuple, & le reduire finalement dans l'impuissance, & dans le desespoir, pour susciter sans doute vne reuolte generale en France, & se mettre par ce moyen à couuert des crimes, dont il voyoit ne pouuoir euitier la recherche & la punition.

En second lieu, le Parlement & la Ville de Paris, sont simplement sur la deffensive, car le Cardinal Mazarin, ne voyant pas de pouuoir plus par les ruzes, les addresses, & les fourberies qu'il auoit pratiquées iusques icy tromper la prudence de Messieurs du Parlement, & eluder les soins particuliers qu'ils prennent pour le Public; il auoit resolu de les perdre, avec la Ville de Paris, qui a entrepris leur protection, & les enuveloper dans vne mesme ruine, ayant à cet effet enleué le Roy en pleine nuit & le, sixiesme du mois de Ianuier dernier, & incontinent fait inuestir la Ville de toutes parts par des gens de guerre, & exercer aux enuirs d'icelle toute sorte d'hostilitez pour la priuer de toutes choses necessaires; ce qui obligea Messieurs du Parlement de pouruoir à la seureté de la Ville de Paris, & de leurs personnes, & à leur commune subsistance, par les mesmes voyes dont ils estoient attaquez, & certes avec raison, car s'il est permis à chacun de deffendre sa propre vie contre toute sorte de violence, & si la nature a armé & muny toute sorte d'armes pour cet effet, il est sans doute bien iuste, qu'une si excellente compagnie, & vne si populeuse Cité, se garentisse contre la faim & l'espée, par la force & les moyes qu'elles en ont; ce qui est d'autant plus raisonnable & legitime, que d'une part Paris est la plus importante, & la premiere Ville du Royaume, le magnifique siege de nos Roys, & le fonds le plus considerable, & le plus assure de leurs finances, & que d'autre-part le Parlement est cet auguste Senat, où le Roy tient son lié de Iustice, où se rendent les Arrests, ou plustost les oracles que toute la France reçoit, & dont l'equité est venerable, mesme aux Estrangers, où les Edicts & Ordonnances du Roy prennent leur plus certaine autorité, n'estans reputez iustes & salutaires, qu'apres qu'ils y ont esté verifiez, où se resoluient & authorisent les Traictez de Paix, les entre-

prises

prises de guerre, les Regences pendant la minorité des Roys, les mariages & apanages des Princes, & les autres plus importantes affaires d'Estat.

D'ailleurs, la deffence du Parlement, & de la Ville de Paris, est d'autant plus iuste, qu'ils n'auoient autre voye pour se garentir de la cruelle vengeance qui alloit tomber sur leurs principales testes, que celle de la resistance, d'autant que d'une-part le Cardinal Mazarin les auoit exclus de tout accez auprès du Roy, & de la Reine Regente, & osté toute esperance de reconciliation, n'ayant pas voulu souffrir que les Deputez qu'ils enuoyerent pour cet effet à leurs Maiestez, incontinent apres leur depart de cette Ville, eussent audience sur les tres-humbles remonstrances qu'ils auoient à faire sur ce sujet, & que de l'autre ils ne pouuoient plus prendre d'assurance en la parole du Cardinal Mazarin, qui la leur auoit faussee desia à diuerses fois; mesmes apres la leur auoir solennellement donnée entre les mains de Monseigneur le Duc d'Orleans: Et en effet, quelle assurance pourroit-on iamaïs prendre en la foy d'un homme qui n'a pas craint de violer la seureté & la liberté commune, & profaner vne réjouissance publique par la capture de ceux du Parlement, qui auoient le mieux merité du Roy, & du peuple, au milieu d'un champ de triomphe celebre, en l'honneur des victoires de nostre Monarque: mesmes en dernier lieu, d'enfreindre vne Declaration concertée & resoluë, avec la Reyne & les Princes, pour le soulagement des peuples, la restauration de l'Estat, & le retablissement des reuenus de sa Maiesté; & qui apres ces honteuses & trop hardies tromperies, a eu l'audace d'enleuer nuictamment le Roy, de calomnier le Parlement, comme s'ils eussent entrepris contre la personne de sa Maiesté de susciter vne cruelle guerre Ciuile en France, & d'ouurir en mesme temps toutes les frontieres du Royaume à l'Ennemy, puissamment armé de toutes parts contre nous. Certainement, s'attendre apres cela à quelque accommodement avec un aduersaire, si faux & si mal-faisant, ce seroit soumettre l'Estat à la mercy de son propre Ennemy, & tendre imprudemment le col à ses coups.

De plus, il est constant, que le Parlement & la Ville de Paris n'ont point pris les armes pour se deffendre contre le Roy, qui ne scauroit iamaïs traiter ses sujets, avec tant d'inhumanité & d'injustice, mais contre le Cardinal Mazarin, qui abusant de l'autorité que la Reine Regente luy a mise en main, apres leur auoir rauy le Roy, leur veut encore rauer la vie & la liberté, par la famine, & par la destruction de ceux qui peuuent les proteger contre sa tyrannie, pour se gorger apres de leurs dépouilles, comme il a

fait de toutes les finances du Royaume; certainement, il n'y a chef en France, qui ignore que le Roy n'estant pas encore en aage d'agir, on ne luy peut point aussi imputer les oppressions qui se font sur son peuple sous son nom, ny personne dans Paris, qui n'y souhaite son retour avec vne extrême passion, & qui ne combatte avec vne affection entiere, pour la conseruation des interets de sa Maiesté, estant tout assuré de recevoir de sa bonté, & de sa clémence, des tesmoignages d'une bien-veillance, veritablement Royale, & paternelle, lors que Dieu luy aura fait la grace de parvenir à sa Majorité.

Il est vray, me dites-vous, que le Cardinal Mazarin fait toutes ces choses de l'autorité de la Reine Regente, qui semble n'estre pas moins absoluë que le Roy; mais quand ainsi seroit que la Reine, en qualité de Regente & administratrice de l'Estat, n'auroit pas vn pouuoir moins absolu que le Roy; (ce qui est contre les loix fondamentales du Royaume; qui ne luy permettent pas d'y rien innouer pendant la minorité.) Cette consideration neantmoins, n'empesche pas que la deffence du Parlement, & de la Ville de Paris, ne soit legitime, & qu'ils ne puissent s'opposer par les armes, contre les attaques que leur fait à guerre ouuerte le Cardinal Mazarin, sans pourtant déroger au respect qu'ils doiuent au nom du Roy mineur qu'il vsurpe, & de la Reine Regente qu'il deçoit par ses pernicieux conseils: & la raison en est, qu'il est question en ce rencontre du salut du Peuple, & de tout l'Estat, auquel toutes autres considerations doiuent ceder; car le Cardinal Mazarin ne veut destruire le Parlement de Paris, que pour abbatre d'un contre-coup tous les autres Parlemens de France, afin de pouuoir disposer apres à sa volonté, & sans resistance, de la vie, & des biens de tous les François, ainsi qu'il auoit fait par le passé, & se rendre finalement maistre absolu du Royaume, par la perte du Roy, & des Princes du sang, dont il s'est saisi à cet effet, avec intention, sans doute, de s'en deffaire quand bon luy sembleroit, apres que sous leur nom, & par leur autorité, il auroit destruit le Parlement, & la Ville de Paris, comme les seuls qu'il croyoit pouuoir s'opposer à sa tyrannie; ce qu'il croyoit de pouuoir facilement executer, en affamant la Ville de Paris: Tellement que cette maxime demeurant pour constante parmy tous les Politiques, que le salut du peuple est la souveraine loy de l'Estat; en sorte que les Rois mesmes sont obligez à l'observation d'icelle, contre leur propre interest, estans establis pour l'utilité & la conseruation des peuples, & non pas les peuples pour eux, & le mauvais dessein du Cardinal Mazarin contre cet Estat, estant tout no-

toire par l'examen de tout ce qu'il a fait pendant son administration, notamment par l'enleuement du Roy, apres l'auoir depouillé de ses plus fideles gardes, & priué de ses plus affectionnez seruiteurs, par la destruction qu'il meditoir des vrais protecteurs de l'Estat, qui sont les Parlemens, & par l'ouuerture qu'il a faite à l'Ennemy de toutes les frontieres du Royaume, en ayant en mesme temps retiré toutes les garnisons, il n'y a point de doute, que Messieurs du Parlement, comme les principaux appuis de l'Estat, ont peu & deu s'opposer directement par toutes voyes, à vn si detestable dessein, mesmes contre l'intention de la Reine Regente: & ce pour deux considerations, notamment

La premiere, qu'ils representent tous les Estats du Royaume, comme tenant la place de cet ancien Parlement, sous nos anciens Rois, qui n'estoit autre chose que l'assemblée des Ducs & Pairs, qui sont les premiers de l'Eglise, de la Noblesse, & des principaux Officiers de Iustice, & par consequent les plus considerables testes de tout le Peuple; aussi est-ce en cette qualite que les Edits de nos Roys leur sont attribuez, & que la faculté leur est donnée, de les approuuer & verifier, ou de les limiter & modifier, mesmes de les refuser tout à fait s'ils le iugent expedient, la domination de nos Rois estant si raisonnable, qu'ils ne veulent pas que leurs Edicts puissent lier & obliger leurs peuples, que premierement ils n'ayent esté acceptez par luy, comme iustes & expediens au bien public.

Et l'autre consideration est, qu'en cette occasion la Reine Regente excède tout euidentmēt son pouuoir, car n'estant qu'administratrice de l'Estat d'autrui, à sçauoir du Roy son Seigneur & fils; Elle n'a point de puissance de le deteriorer, ny d'en changer les ordres & les maximes, comme elle a fait par vne infinité d'Edits, & Declarations non deuëment verifiez; ains elle est obligée de soumettre ses ordres & mandemens, au iugement du Conseil du Roy, afin de leur donner par leurs suffrages, le poids & l'efficace des choses iugées. Or ce Conseil qui a droit d'en connoistre de la sorte, n'est pas celuy qui suit la Cour, ou en fait vne partie, veu qu'elle n'est composée que des Maistres des Requestes dont la connoissance est tres limitée, & de Conseillers d'Estat, qui ne sont point vrais Officiers, ains simples Commissions que le Roy fait exercer à son plaisir, mais doit estre celuy où le Roy tient son liët de Iustice, où les Rois declarent leur plus certaines volonteés en toutes matieres importantes, c'est à sçauoir le Parlement.

Or s'il est loisible à vn simple particulier, de resister à vn Magi-

Il rat excédant son pouuoir, au cas qu'il ne vueille deferer à son apel on ne peut nier qu'il ne soit beaucoup plus licite à cét Auguste Senat qui a autorisé la Reyne en sa Regence, qui represente tous les Estats du Royaume, & qui tient en depost la principale & plus ferme volonté du Roy, des'opposer à ce qu'elle fait, par l'aduis pernicieux du Cardinal Mazarin, contre les loix & ordonnances de l'Estat, & par conséquent il luy est aussi permis apres qu'elle a negligé les tres humbles Remonstrances, si souuent reiterées sur ce suiet, & refuse absolument de les ouïr en dernier lieu, de se maintenir en sa liberté & puissance par armes, contre la force & violence, par laquelle elle le veut contraindre & assuietir, & empêcher par ce moyen, la desolation de l'Estat qu'elle appuye & autorise notamment, puis que les premiers Princes gagez par les artifices du Cardinal Mazarin, en ont abandonné le soin, autrement il se rendroit luy mesme responsable du mal qui en arriueroit pendant la minorité du Roy.

Adioustez à cela, que comme les Sujets doiuent obeïssance aux Roys, les Roys leur doiuent protection: ces deuoirs sont reciproques, en sorte que qui manque à l'un, décheoit necessairement de l'autre, & ainsi d'abord que les Roys priuent eux mesmes de leur protection leurs Sujets sans Iustice, ils les absoluent du serment de fidelité, & leur mettent en main les armes, pour se deffendre legitiment contre leurs oppressions, d'autant qu'ils sont establis pour regir & proteger leurs peuples, non pour les opprimer: c'est pour cela que les vrais Roys & Princes ont de coustume auant que d'employer leurs armes contre leurs Sujets & Vassaux, de les faire citer & condamner auparauant, par des Iuges legitimes, & les faire declarer rebelles & felons, afin que les exploits de guerre qu'ils font en suite contre eux, paroissent plustost vne execution raisonnable de la condamnation qu'ils ont encouruë, qu'en effet de colere & de vengeance, qui sont passions basses & indignes de la Maïesté des Roys, tant il leur est important, & pour ainsi dire, essentiel, d'estre tousiours dans les termes de Iustice: Et si pour la mesme consideration ils ne peuuent perdre vn simple particulier, du moins avec apparence de Iustice, sans le faire condamner sur quelque pretexte, beaucoup moins vne Ville & la principale du Royaume, à la perte de laquelle celle de l'Estat est inseparablement coniointe: Or, qui examinera sainement le procedé du Cardinal Mazarin, contre le Parlement & la ville de Paris, soit au regard du suiet, soit au regard de la maniere d'agir, il trouuera tout le contraire: car premierement quand au suiet, il est constant qu'il n'en veut au Parlement, que parce qu'en procurant du soulagement aux peuples,

peuples, & remediand aux abus qui se sont commis iusques icy aux Finances de sa Maiesté, ils ont arresté le cours de la tyrannie, qu'il auoit dessein de continuer sur le peuple, iusques à l'entiere desolation du Royaume, & qu'ainsi, ils ont puissamment affermy l'Estat qu'il esperoit & espere encore sans doute, par les troubles & les confusions qu'il y a semées, de pouuoir vsurper & partager avec l'ennemy; & à la ville de Paris, que parce qu'elle s'est opposée à la violence, par laquelle il vouloit iniustement opprimer le Parlement, pour le faire condescendre à ses desseins, & l'obliger d'abandonner l'interest du public; & quand à la maniere d'agir on ne trouuera point pour le regard des Officiers du Parlement qu'il les ait fait accuser & condamner par des Iuges legitimes, ainsi qu'il estoit obligé de faire du moins par contumace: Au contraire, lors qu'on a mandé demander ceux qu'il presuposoit auoir conspiré avec les ennemis de l'Estat, afin que leur procez leur fut fait & par-fair, il n'en a sceu nommer aucuns: Et pour ce qui regarde les Bourgeois de Paris, on ne trouuera point non plus qu'il les ait fait sommer de luy liurer ceux du Parlement qu'il disoit auoir conspiré contre l'Estat, & qu'à deffaut de ce, il les ait fait condamner, ainsi qu'il deuoit faire, afin de trouuer moyen de leur courre sus, du moins avec apparence de raison: Au contraire, par vne façon du tout ridicule & pleine d'une noire & du tout lasche perfidie en mesme temps qu'il les fit declarer innocens & fidelles Sujets du Roy, par des lettres du petit cachet, qu'il fist escrire au Preuost des Marchands & Escheuins de la ville, le mesme iour qu'il en eust enleué le Roy, il les fait inuestir de toutes parts par des gens de guerre, & exercer contre eux, toutes les hostilitéz & les violences que les Demons ont iamais peu inuenter: ce qu'il reconnoist aujourd'huy luy-mesme si extraordinaire & hors des formes legitimes, que pour en réparer la faute & la honte éternelle qu'il en encourra, parmy toutes les nations du monde, ne voyant plus de pouuoir venir à bout de son dessein par cette voye, il leur enuoye des Herauts d'armes, pour les declarer soumis à la rigueur des armes, apres leur auoir fait vne guerre ouuerte pendant six semaines, mais encore, falloit-il pour donner quelque apparence de Iustice à ce procedé, & mettre les Bourgeois de Paris dans vn tort du moins apparent, leur faire voir quelque condamnation legitime, contre ceux du Parlement qu'il pretend estre coupables.

Vne si cruelle façon d'agir enuers des Sujets, trouueroit à peine lieu parmy les Cirthes & les Barbares, ie ne diray pas parmy des nations libres, & qui portent le nom de Chrestien: Dieu n'a point estably de puissance purement absoluë entre les hommes, ains a

donné de certaines bornes & limites à toute domination, afin que ceux qui sont en autorité, considerent qu'elle leur est donnée sur des hommes de mesme nature, & qui portent comme eux l'image de Dieu. C'est pourquoy bien que parmy les Israélites, l'usage des Esclaues fut permis, le pouuoir des Maistres estoit neantmoins restreint & contraint à certaines conditions, au delà desquelles, il ne pouuoit subsister, en sorte que si le Seigneur par ses services pochoit vn œil à son Esclaue, ou luy enfonçoit vne dent, il estoit obligé de l'enuoyer libre pour cette mutilation, & descheoit de sa puissance pour l'auoir portée à trop de violence: Et les Romains quoy qu'ils n'eussent autre lumiere que celle de la nature, n'auoient point ignoré cette mesme équité. Ayant obligé par plusieurs de leurs loix, les Maistres qui traittoient leurs Esclaues avec trop de tyrannie, de renoncer en leur faueur à leur propre puissance, si donc les Seigneurs qui auoient vn pouuoir absolu sur leurs Esclaues, & qui se les acqueroient pour leur propre vtilité, & à mesme titre que leurs autres biens, & leurs bestes n'auoient point droit d'en abuser ny de les traiter avec trop de rigueur, beaucoup moins les Princes & les Roys, ont-ils droit de mal traiter leurs Sujets, & d'exiger d'eux, des conditions trop seueres, veu qu'ils sont eux-mesmes donnez à leurs peuples, & qu'ils doiuent rapporter toute leur administration au bien & vtilité d'iceux, n'ayant à vray dire de pouuoir sur eux, qu'autant qu'il est necessaire pour les regir & les gouverner, & ainsi, vous pouuez iuger par toutes ces considerations, si les confiscations, interdictions, suppressions d'offices, & autres peines que le Cardinal Mazarin fait publier, soit contre le Parlement, soit contre la ville de Paris, sont considerables & legitimes, notamment pendant vne minorité, quand mesme le Conseil auroit iurisdiction contentieuse & criminelle, ce qu'il n'a pas, au contraire, l'on en peut iustement conclurre, que bien que le Cardinal Mazarin fasse toutes ces choses sous le nom du Roy & de l'Autorité de la Reyne Regente, neantmoins puis que c'est contre tout droit diuin & humain, & contre le deuoir d'un vray Roy, le peuple a tres suiet de s'y opposer, & de repousser la force, par la force, & que la Reyne s'estant, par l'approbation qu'elle y donne, despoüillée de la charge de Regente, elle a en tant que de besoin, affranchi le Parlement & le peuple de sa suietion, & mis en la faculté de luy resister, les armes avec lesquelles elle les opprime, estant non vne force legitime d'un Prince veritablement offensé contre des Sujets rebelles, mais vne pure hostilité ennemie, qui n'a autre but que la conseruation d'un homme non seulement Estranger, mais Sujet naturel du Roy d'Espagne, qui a fait mil manquemens, ou pour mieuz

dire, commis milles infidelitez & trahisons en son Administration, & qui fait voir clairement par le succez de ses actions, qu'il n'a jamais eu autre dessein, que de laisser le Royaume dans vne desolation lamentable, apres s'estre enrichy de ses despoüilles.

Que si pour sa iustification, vous m'alleguez les éloges affectez & en partie supposez, qu'il se fait donner par la Declaration du Roy portant suppression des offices du Parlement, ie n'ay qu'à vous dire que nous deuons la paix de Casal à nostre propre vertu, plustost qu'à sa negociation, & que les Espagnols n'ont pas esté portez à nous quitter ceste ville, par la persuation d'un si foible entremetteur, ils ont consideré la resolution & la valeur inuincible de nostre armée, qui la voyoient toute prestée à les forcer & deffaire, en sorte que s'il s'est acquis quelque obligation dans ce rencontre, c'est plustost sur les Espagnols, ausquels il sauua vne honteuse & entiere deffaitte que sur la France, à laquelle il enuia vne victoire certaine. Et quant à la Sauoye, elle a accepté la protection de la France, auant que le Cardinal fut dans les affaires, & lors que le feu Duc de Sauoye laissa volontairement Pignerol entre les mains du Roy, il vint de son propre mouuement chercher dans l'amitié & la faueur de nostre Monarque, le repos & la seureté, dont l'Espagne n'auoit pû le faire iouir : mais quand les seruices du Cardinal Mazarin nous auroient esté vtils en ces deux rencontres, les bienfaits qu'il a receus du feu Roy, l'en ont recompensé au centuple, comme il le recognoist luy-mesme ; & il a tesmoigné en tout ce qu'il a fait depuis qu'il ne nous auoit point seruy par vne vraye affection, mais seulement pour s'introduire & s'autoriser, afin de s'acquiescir de l'employ, & de se mettre en credit, pour nous pouuoir piller & trahir comme il a fait.

Que si vous m'alleguez encore ce qu'il fait publier par ses libelles, & qu'il a eu si peu d'ambition, qu'il ne s'est acquis aucunes places ny gouuernemens en France ; ie vous respondray que ceste adresse par laquelle il a endormy les esprits, a esté vne maxime bien plus asseurée pour l'establissement de sa tyranie en France, que les places & les gouuernemens qu'il y pouuoit auoir, car par ce moyen il a voulu euitier la ialousie des grands, qui eussent peu choquer & controller ses actions, & ainsi a eu plus de moyen & de liberté de faire ce qu'il desiroit. Et maintenant apres auoir affoibly la France, d'une de ses principales forces, qui est l'or & l'argent, il peut avec iceiluy, se rendre bien-tost Maistre des principales places du Royaume si Dieu ny remedie : Mais pour en parler plus sainement, n'auoit-il pas desia les places qu'il vouloit en sa puissance, puis qu'ayant un pouuoir absolu sur la Reyne, il dispoisoit à sa vo-

lonté de tous les gouuernemens, en faueur de ses plus affidez, en priuant les seruiteurs du Roy les plus fidelles, & qui les auoient le mieux meritez par leurs seruices, ainsi que l'on pourroit iustifier, par vne infinité d'exemples, qui sont connus à tout le monde. Certe façon d'agir auoit bien moins d'éclat, mais auoit bien plus d'effet pour appuyer sa tyrannie.

Mais sans nous arrester dauantage sur ce qu'a fait le Cardinal Mazarin, qui est assez connu de tout le monde, examinons de plus près ce qu'ont fait Messieurs du Parlement, & voyons s'il y auoit quelque lieu de les declarer criminels, mesmes en la plus rigoureuse Iustice, ils se sont trouuez obligez pour la descharge de leurs consciences, de se formaliser de l'estrange dissipation qui se faisoit des finances de sa Maiesté, des exactions perpetuelles, & extraordinaires, dont le pauure peuple estoit trauaillé depuis long-temps, des pilleries dont il estoit opprimé par les gens de guerre, du defaut de payement des troupes de sa Maiesté, & de la tyrannie insupportable que le Cardinal Mazarin exerçoit sans forme de Iustice, contre plusieurs personnes de probité & de qualité importante: ils ont trouué que depuis la Regence, il s'est leué des sommes, deux & trois fois plus grandes, que sous les Regnes precedens, mesmes lors que la France n'auoit pas de moindres guerres sur les bras, que neantmoins l'on a laissé à diuerses fois perir des armées entieres à faute de payement. Que l'on a rayé l'Estat des pensions dont le feu Roy auoit gratifié les Princes, Gensilhommes & autres, qui auoient merité ses biens-faits par leurs seruices importans, retenu les gages des Officiers, diuertty les rentes de l'Hostel de Ville, au preiudice des Proprietaires, & alliené tout le domaine du Roy, & qu'outre cela la Couronne s'est engagée de cent cinquante millions: Que l'on a exigé les tailles, & autres impositions sur le peuple à main-armée, avec des rigueurs horribles; Que pour n'en pouuoir diuertir les deniers, on en a osté la connoissance aux Tresoriers de France, & à la Chambre des Comtes, par vn abus tout manifeste des ordonances de Cōptans; Que pour auoir pretexte de continuer les leuées extraordinaires sur le peuple, on a tiré en vne extrême longueur la guerre, & refusé à diuerses fois de la terminer avec grand auantage pour la France. Que l'on a fait languir plusieurs personnes en prison, sans aucun legitime suiet, deporté & relegué les autres en diuers lieux eloignez, empoisonné les autres, employé les faux tesmoins, & les calomnieuses accusations contre les autres, pour les perdre avec quelque apparence de Iustice; & en vn mot, que tout estoit tellement peruertty, qu'il n'y auoit plus de seureté pour les gens de bien

bien. Que l'autorité du Roy degeneroit en vne tyrannie ouuerte par la mauuaise foy du Cardinal Mazarin, & que l'Estat estoit dans le penchant d'une ruine ineuitable : Ils en ont fait à diuerfes fois leurs tres-humbles remonstrances à la Reyne Regente, lesquelles finalement ont esté trouuées si iustes & si equitables, que nonobstant tous les obstacles, & les artifices dont le Cardinal Mazarin se seruit pour l'empescher : Leurs Maiestez leur accorderent au mois d'Octobre dernier, par l'entremise & le consentement des Princes, la Declaration, dont il a desia esté parlé pour la reformation des abus qui auoient eu cours iusques alors, par laquelle le peuple est aucunement soulagé, les reuenus de sa Maiesté reestablis, le repos des gens de bien affermé, & tout l'Estat puissamment affermy.

Cette Declaration n'eust pas plustost esté publiée, que le Cardinal Mazarin, se mit en estat de l'aneantir, ainsi qu'il a esté remarqué au commencement de ce discours : Messieurs du Parlement s'y opposerent, ne voulurent la faire executer suiuant sa forme & teneur, ainsi qu'il leur estoit mandé par icelle. Le Cardinal Mazarin se voyant par ce moyen privé de toutes ses esperances, & en estat de ne pouuoir euitter la recherche & la punition de ses maléfices, s'il ne perdoit le Parlement : Il se résolut à cette cruelle entreprise, & pour la pouuoir executer avec plus de facilité & d'autorité, il enlena le Roy, & fist boucher de toutes parts le passage des viures à la Ville de Paris, par des gens de guerre, pour l'obliger par la faim de luy liurer le Parlement, ou du moins les envelopper tous dans vne meisme ruine. Que pouuoient donc faire Messieurs de Parlement en vne si estrange conioncture ? qu'opposer la legitime & veritable autorité du Roy, qu'ils tiennent à present en depost contre celle qui n'en a que l'apparence, & declarer perturbateur du repos public, & ennemy du Roy & de l'Estat, l'auteur d'une si estrange tyrannie, & la cause notoire de tant de malheurs, & tant pour l'exécution de leur Arrest, que pour la conseruation de la Ville de Paris, & de leurs propres vies, employer les armes que les Rois leur ont mis en main, pour appuyer l'exécution de leurs iugemens, afin que la force en demeure à Iustice. Quoy ! Messieurs du Parlement seront-ils coupables pour auoir rendu la main à plusieurs personnes de marque, qu'on a longuement detenus en prison, sans aucun sujet ? Pour auoir veu avec emotion la calamité de ceux qui ont esté deportez & faits mourir secrettement sans forme de Iustice ? Pour auoir assuré du moins pour l'aduenir, la vie, & les fortunes de tous ceux qui subsistent encore alencontre d'une si rude & si estrange façon d'agir ? Pour auoir apporté

allegement aux souffrances du pauvre peuple, remis le Roy en la plaine possession de ses reuenus, & restably l'Estat chancelant de toutes parts? Au contraire, s'ils estoient criminels en cela, ce seroit pour auoir trop long-temps dissimulé le mal, comme ils ont fait pour l'honneur de la Regence: Estant certain qu'ils ne pouuoient differer plus long temps d'y apporter le remede necessaire, par vne scrupuleuse veneration de l'autorité de la Reyne, sans se rendre coupables de la ruine de l'Estat, & charger leur memoire d'un honteux & eternal reproche, d'auoir manqué au Roy & à leur Patrie, ainsi qu'il arriuera sans doute à ces Ministres d'Estat, qui pour des considerations lasches, & des interests qui sont connus à tout le monde, ont adheré iusques icy, & adherent encore à present, aux pernicious conseils du Cardinal Mazarin, contre leur propre honneur, leur propre conscience, & le seruice qu'ils doiuent au Roy & à leur Patrie.

Finalemēt, nous auons vne marque certaine de la Iustice de la cause que nous soustenons, en la benediction que Dieu verse tout euidentement sur ce party, & sur tous les desseins du Parlement, en ce rencontre, & en la protection particuliere qu'il demontre visiblement sur la Ville de Paris, en diuerses façons, notamment en la longue & presque miraculeuse subsistance d'un si grand peuple, & en l'Vnion estroite que l'on y a remarqué iusques icy, & qui s'affermis de iour en iour, nonobstant les efforts & artifices du Cardinal Mazarin, & de ses Supposts, pour la rompre. Et ainsi bien loin de me départir d'un si vile & raisonnable dessein, qu'au contraire, j'espere de vostre generosité & de vostre affection au bien public, que vous ioindrez vos vœux & vos forces à celles du Parlement & de la Ville de Paris, pour la gloire de Dieu, le soustien de l'Estat, & le repos de vostre Patrie.

F I N.

1. The first part of the paper is devoted to a general
discussion of the problem. It is shown that the
problem is of great importance and that it has
not been completely solved. The author then
presents a new method for solving the problem.
This method is based on the use of the
variational principle. It is shown that this
method is more accurate than the previous
methods. The author then applies this method
to the case of a specific problem. It is shown
that the results obtained are in good agreement
with the experimental data. The author then
presents a new method for solving the problem.
This method is based on the use of the
variational principle. It is shown that this
method is more accurate than the previous
methods. The author then applies this method
to the case of a specific problem. It is shown
that the results obtained are in good agreement
with the experimental data.

